

KAN THLARAU LAM HMELMA I DO ANG U

- *Pastor C. Malsawmzela*

1 Peter 5:8 *“Ngaihven ula, fimkhur rawh u; in khingpui Diabola chu sakeibaknei rum thin angin a ei theih tur zawngin a phi ruai thin; in unau khawvela awm hote chungah chuan chutiang tuarna chu a thleng ve a ni tih hriain, ring nghet taka awmin amah chu do rawh u.*

Ringtu zawng zawngte hian hmelma kan nei theuh a, chu kan hmelma nen chuan nitin kan indo thin a, indona mualah kan awm vek a ni. Kan buante hi tisa leh thisen an ni lova, lalnate, thuneihnate leh he thim chungah khawvel roreltute leh, van hmunah te thlarau sual awm hote an nih zawk thu Ephesi 6:12 kan chhiar chuan kan hre thei awm e. Chuvangin he kan khingpui hi mit lawnga hmuh mai theih a ni lova, mihring rilru suangtuahna maiah hian a awm lova, thawnthu phuahchawp mai mai lah a ni hek lo.

TUNGE KAN THLARAU LAM HMELMA CHU?

Tunah pawh hian chhung lam leh pawn lamah hian thlarau indona a awm mek a ni. Chuvang chuan hnehna chang tur chuan ral rel dan te kan thiam a pawimawh a, khawi lam atangin nge hmelmate'n min rawn beih thin tih te kan hriat a ngai a, chutiang bawkin kan hmelmate kan hriat chian a pawimawh em em a ni. Chuti ni lova, kan hmelma te kan do laia anmahni hrechiang hawt lova chempui nena an silaimute kan lo hmachhawn mai chuan a fuh dawn lo a ni. Kan Thlarau lam hmelma hi ti hian sawifiah tum dawn ila a tha awm e. Chuvangin he thlarau lam indonaah hian a hmasain kan hmelma - Setana leh a thuihruaite (ramhuaite/thlarau sualho) hi kan hriatchian a pawimawh em em a ni. Kan hriat reng tur chu he indona hi kan indona a ni lova Lalpa indona a ni tih hi a ni. Heng hmelma pahnihte chiang zawkin hi han thlir thuak thuak the ang:-

1. Setana: Setana, Danbawhchhepa - hi a awm tak tak a, thlaraua awm a ni a, fing tak a ni a, he khawvela a thil tum ber pawh ruk ruk te, tihlum te leh tichhiatte hi a ni (John 10:10). Hebrai twang 'Setana' tih hi a awmzia chu 'hektu' emaw 'hmelma' tihna te pawh a ni thei awm e. Bibleah chuan Setana hi thlemtu, Eden huana mihring hmasa Adama leh Evi thlemtu a ni tih kan hmu thei a, Joba Pathian hmaa hektu a ni a, Lal Isua he khawvela rawng a bawl tan dawna thlemtu a ni a, Juda Iskariot-a chhunga luta Lal Isua mantirtua hmangtu a ni tih kan hmu thei bawk.

Setana hi Pathian anga khawkipa awm a ni ve lova, engkim hria leh engkim tithei a ni ve hek lo. Mahse hmun hran hranah chuan a inlar thei thung awm e. Pathian vantirhkoh zingah pawh a chhuanawm berte zinga mi a ni a, mahse a chapona avanga Pathian a do avangin paihthlak in a awm a, hetia paihthlaka a awm hian amah maia paihthlak a ni lova, a thuihruai tam takte nen paihthlak in a awm a ni. Thupuan 12:4 kan chhiar chuan vantirhkoh hmun thuma thena hmun khat a ruala paihthlak an nih thu kan hmu thei a ni.

Setana hian nihna hrang hrang a nei a, kan Khingpui (hmelma) (I Pet 5:8) a ni a, dawta mite bumtu a ni a (Jn 8:44), rukhmang a ni a, a fing vervek em em a (II Kor 11:3), tihlumtu a ni bawk a

(Jn 8:44), mite hektu a ni a (Thup 12:10), thlemtu a ni a (Matt 4:3), eng tirkohva insiamchawp a ni a (II Kor 11:13-15), khawvel pathian (II 4:4) a ni a, drakon, rulpui tar (Rev 12:9) a ni bawk. Setana hian mihringte rilru hi a indona mual pui ber pakhat a ni a, tisa leh thisen lamah min do lovin kan rilru leh thlarau lamah hian nasa takin min do thin a ni.

Engtiklai mai pawh hian Setana hian a ei tur zawngin ringtute tha thlah miah lovin min veh reng a, hun remchang a zawng reng a ni. Rinna kawnga kan panna lai te, kan derdepna laite hi a veh than than reng a ni tih kan hriat reng fo a tha awm e. I hria emaw hre lo emaw Setana hian a bei reng che a, I awmna a hria a, I chak leh chak loh a hre ve zel a ni. Chuvang chuan I chakloh lai kha chang ranin sual kawng zawhtir tum chein a inbuatsaih reng thin a ni. Mahse keini ringtute chuan kan hriat reng tur chu kan chungah hian thuneihna pakhat mah a nei lova, Pathianah rinna kan neih tlat chuan ani hneh mai mai theih kan ni lo a ni.

2. Ramhuaite: Setana, van atanga paihthlak a nih khan a thuihruai tam tak te pawh paihthlak ve an ni a, chung mite chuan a rawng an bawlsak chhunzawm ve ta zel a ni (Ezek 28:15). Heng ramhuai hote'n an tum ber chu Pathian sawichhiat a, mite pawh sual lam kawnga hruaia Pathian an hmangaihna atanga hruai pen hi a ni deuh ber awm e (I Pet 5:8; II Kor 4:4; 11:14-15). Lal Isua zuitute nasa taka beitate an ni a (II Kor 12:7; I Pet 5:8), Pathian vantirhkohte beitu an ni bawk (Thup 12:4-9). Bible atanga kan hmuh angin heng ramhuaite hian mihringte hi min hneh thei a, kan kawchhungahte pawh hian an lut thei thin a ni. Lal Isua he khawvela a lo len lai pawh khan mi kawchhunga ramhuai awm pawh tam tak a hnawtchhuak a nih kha. Tin, Lal Isua thupek hnuhngah pawh khan ama hminga zirtirte'n ramhuai an la hnawhchhuah tur thu a sawi a nih kha.

RINGTUTEN ENGTIN NGE KAN THLARAU LAM HMELMA CHU KAN DO ANG?

Thlarau indonaa cheng kan nih avangin engtin nge kan hmelma chu kan hneh tak ang tih I han sawi dawn the ang:

1. THUNEIHNA – Ringtu tu mai pawh hi Lal Isua hming thiltih theihna hmang chhuak thei kan ni a. Setana leh a thiltih theihna phuar tur leh dang tur hian Lal Isua hming thiltih theihna hi kan hmang thin tur a ni. Marka 16:17-ah pawh Lal Isuan a thuchah hnuhngah “Ka hmingin ramhuaite an hnawt chhuak ang a; tawng thartein an tawng ang...” a tih kha kan hre reng tur a ni.

2. TAWNGTAINA – Kan duh leh kan dil kan hmuh hma chuan ringtute chuan bang lovin ka tawngtai thin tur a ni. Ringtu mi pahnih pathum emaw mi tam zawk kan punkhawm na na chuan hneh kan harsa thin a, chutiang bawkin kan chak lohnaah kan intanpui tawn a, a huho chuan chakna nasa tak kan lo nei thin a ni. Chuvangin Setana leh a thiltihtheihna hneh tur hian ringtute chuan tawngtaina nen tan kan la tur a ni. Tin, Setana hnathawh thenkhat hi chu Chawnghei tawngtaina nen chauha hneh theih te a awm ve bawk tih Bible-ah kan hmu bawk (Matt 17:19,21).

3. PATHIAN CHENCHILHNA – Setan thiltihtheihna hnehin lo hnawt kiang tawh mah ila, chu hmun ruakah chuan Pathian a chen nghal loh chuan harsatna dang a awm leh mai thin, chuvang chuan hmunruak awm chu Pathian chenchilh theih turin kan buatsaih mawlh mawlh a ngai thin a ni. Chumi nun nei thei tur chuan Bible kan chhiar tam a, Pathian hnena kan tawngtai tam a pawimawh a ni. Nitin a thu kan chhiar-a a hnena kan tawngtai chuan kan nun hi kan rin loh lai hian chawikanin a awm a, Pathianin min lo veng reng thin a lo ni. Pathian kan hnena a chen tlat chuan sual tan luhna hun leh hmun a awm thei ngai dawn lo a ni. Eph 4:27 kan chhiar chuan “Diabola chu hmun kian hek suh u” tih kan hmu a, chuvang chuan Setana tan hian hmun kan kiang hlek tur a ni lova, kan do char char mai tur a ni.

4. DO LETNA – Pathian hnenah intulut ila, Pathian kan hnaih nge nge thin. Setana hian Pathian hnaih ringtute hi a hlau a, a tlanbosan nge nge thin. Chuvang chuan Setana kan doletna tha ber pakhat chu Pathian kan hnaihna hi a ni. Jakoba 4:7 kan chhiar chuan "Chutichuan Pathian thu thuin awm rawh u; amaherawhchu Diabola dodal rawh u, tichuan a tlanbosan ang che u " tih kan hmu a ni.

5. INKULHNA – Setana do tur chuan Pathian ralthuam famkimin kan inthuum tur a ni a. Eph 6: 13-17 a kan hmuh angin Setana leh a hnathawhte do tur chuan Pathian ralthuam famkima kan do let ve a ngai a, chuang ralthuamte chuan keimahni hi kan inkulhin kan inveng reng tur a ni. Eph 6 thuah hian Pathian ralthuam chi hrang hrang kan hmu a, chung zingah chuan a then chu mahni invenna lam ral thuam a ni a, chung te chu – thutak kawnghren te, felna awmphaw te, remna Chanchintha te pheikhawk te, rinna phaw te, chhandamna lukhum te an ni. Tin, Setana kan va tihnatna ve tur hriam hrei a awm bawk a, chu chu Pathian thu (ngunhnam) leh tawngtaina hi an ni. Heng hmang hian mahni kan invengin kan inkulh tlat ang a, kan hmelma Setana hi kan do let ve tur a ni.

TLANGKAWMNA: Tunlai khawvel kan thlir chuan Setan hian nasa takin ringtute hi min bei mek a, mi tam tak chu bumin an awm a an thlarau te hian pawh an thisenin an hralh mek a ni. He thlarau indona hi a vawrtawp a thleng mek tawh a, chutah chuan keini ringtute hian tha thawh ve tur tam tak kan nei a, muanga chawl mai mai hman kan ni lo tih I inhria ang u. Zam lovin Lalpa chakna ringin bei ila, theihtawp I chhuah tlang the ang u. He Thlarau Indona hi Lalpa indona a ni a, hnehna chu Lalpa ta a ni si a.